

霞浦縣志卷之二十一

外交志

自海禁開條約立通商設埠傳教內地遂無處不有西人足跡霞邑地處閩北山重水複風氣鮮通與外人交涉者惟教會而已耶蘇天主其教規亦本善意乃莠民緣以爲姦教案層出地方官不明條約不諳國際法其交涉往往失敗於是教徒愈張民氣愈激積不相能各行省多有其事後乃交涉者漸明其故莠民無所施其技彼此意見亦泯日趨和平幾無教案之可言矣志外交

教案交涉一

霞邑自基督教會成立城鄉入教者固不乏人其初民教之間尙少抵牾卽偶有涉訟者一憑地方官審理而西教士不與聞也涵江

霞浦縣志

外交

生員陳惟明與同鄉之入教者爭辯教者不能敵愾諸教會且誣以毀教嗾使教會函縣嚴懲惟明而縣官徇教士之請風雷並厲惟明避匿而函催愈亟縣官慮無以應之再三具詳於學使者先禡惟明之衣頂惟明乃出而投案是日集訊觀者塞途縣官不能定讞發押捕衙教士復函府經郡守嚴公提訊仍未決改押經歷署明年寇令宗華蒞任經一再庭訊畧爲具文伸雪並經福建洋務局以毀教無憑其證人卽是訴訟人等字樣文駁英領事始稍稍讓步然惟明猶未出囹圄也迨劉公玉璋來宰是邦始爲解脫並復其衣頂焉考此案起於口頭辯駁之微其官書之紛馳由府縣而藩臬而督撫推而至於洋務局學使者英領事並京師總理衙門皆有此項公牘往來此案起訖凡六載歷三知府九知縣清代拙於交涉如此

教案交涉二

附城松山村游民數輩設館延技師習拳術一日館內設宴缺用具
有魏開春者習拳技之一者也假於村內基督會入門無人携几
榻等物而去意蓋謂同鄉相識暫假片時無待詢也迨會中人歸
覓物不見知爲拳館假去向之索取並責以擅取之非開春出而
與之辯但醉飲之餘言多失度教會聞之積不能平奔告教士教
士以拳匪餘孽字樣上之總教蓋時值拳團肇釁八國聯軍入京
師與我國嚴重交涉之後兩月事也推教會之意非將開春並習
技首事諸人明正典刑不可而縣官宋公尊爵對於此案明知事
起細故不過將開春等略一懲警可以了事特開春等悚於拳匪
題目驚鳥先飛莫能到案無以覆教會之命耳案延兩月英領事
特派副領麻賡恩蒞霞函縣開庭會鞫此案幸麻副領與邑紳王

霞浦縣志

外交

二

邦懷有舊謁見時代剖各情並爲開春輩認非謝罪麻亦釋然翌
日會訊卽明許開春等罰辦了結云附列基督天主兩教會

基督教

清光緒九年英人馬約翰教士到地創設賃城內關帝廟邊陳宅爲
教會行之數十年漸推漸遠教會林立幾於無地不有統計城鄉
入教者不下八千餘人又收買城西一帶民房照西式建築爲男
女學校男女醫院並西教士西醫生之住宅以爲教產

天主教

清光緒二十六年葡萄牙人賈賴蒙故士到地創設賃城南錢塘里
爲教會嗣遷入上西坑陳宅各鄉柯均設有教會入教人數城鄉
約有三千餘人近年城教會有附設公教進行會並育嬰堂焉